


Aruba Dushi Tera

Antes



*Portret di Oficina di Gezaghebber sacá rond di año 1940.
Observá e autonon.*

Mira dos portret di e mesun edificio, sacá for di e mesun angulo, pero solamente tin mas o menos 60 año entre nan dos. E edificio aki a wordo construí na 1936 como oficina di gezaghebber y otro oficinanan di gobierno, e tempo ey 'landsdiensten'. Esaki a bira e di tres oficina di gezaghebber.

E prome tabata caminda awor ta Museo Archeologico - dilanti kerki protestant - cual edificio a wordo construí na año 1911. Tabata gezaghebber Wagenmaker kende a drenta e prome oficina na 1929. Ariba tabata oficina di gezaghebber, censo y ontvanger. Abao tabata douane.


Na año 1934 e oficina a muda y bai na su segundo oficina, caminda B. J. Arends & Sons (Hardware) ta situá awor, esta Wilhelminastraat 59. Dos año despues - dia 3 di maart 1936 - e oficina nobo pa gezaghebber a habri den J. G. Emanstraat (mira portret ariba). Su di tres oficina. Pero pa motibo cu tabata tin varios departamento di gobierno den e

edificio aki, esaki a bira pretá. Pronto nan a construí e hala cu ta sali den Arendstraat. Na e parti pabao (riba e portret na man robez) tabata Postkantoor. Otro departamentonan cu tabata eyden, tabata: Censo, bestuurskantoor, domein, biblioteca, accountantsdienst. Despues di año 1951 - tempo cu algun departamento di gobierno a wordo descentralisá - varios departamento a muda pa nan propio edificio. Solamente landsdiensten y husticia a keda eyden. Awendía henter e edificio historico aki ta hospeda tur departamento di Husticia so.

Comparando e dos portretnan aki nos ta ripará cu e cambio na e edificio mes ta casi nada. Un tempo tabata tin te hasta un bunita parke cu matanan grandi su dilanti. Despues di tempo el a verval pa descuido. Poco año pasá nan a renobé y hasta nan a instalá un fontein eyden. Pero ni make cuanto nan a traha pa embeyesé e parti di Oranjestad aki, nada no a wanta! Loke ta un berdadero lastima!

E unico cu tey ainda, fuera di e edificio mes, ta e 'Obelisk' (gedenknaald) net ey dilanti, cu a wordo construí pa recordá e di 40 año di Reinado di Reina Wilhelmina (1898 - 1938) dia 6 di september.

E edificio aki ta representá pida di nos historia cu nos no por laga bai perdí.



Edificio di Husticia na año 1999.

Awor

ICH

*Fotos cortesía:
Archivo Histórico Nacional
Joricuba*



CHABALITO

Number 9 - Año II - Mei, 2000 - Afl. 2,=

